

瀟

湘

聽

雨

錄

段成式酉陽雜俎孫光憲北夢瑣言皆在楚所著也地處偏遠中土至者殆以筆墨爲娛不獨湘中歲時諸記專紀方輿已也乾隆乙亥歲奉侍家母至舍弟蔗畦常寧署來歲之夏回廣陵數月復至衡州留止今八年矣見聞所及聞事筆疏歸舟無藉編寫成冊舊聞近語偶一緝閱頗足訓對故鄉交舊卷中大半與蔗畦所共對牀聽雨固兄弟故事也因以名之夫瀟湘閒地也聽雨閒況也閒人寓食署齋豈侈述哉家令君衡州詩云聊以著書情暫遣他鄉日消磨景光亦略溯先門餘韻已爾

乾隆二十八年癸未歲冬至舟泊岳陽廣陵江昱識

人
恂字子九

江陰人
官至知府

蔗畦名恂乾隆癸酉選拔于德量字秋

史卒世探花其家學專于金石考訂

清泉志印父子兄弟可分輯極有體

裁賓谷此書不說部中可採者甚時

官玉山徽州太守秋史官玉侍神順賓谷

為梓有遊子而朱顏之惜也

是乾得初學也

兩頭皆佳志里恂俱列人如內恂之怪怪曰是心為要也
此書附錄曰字誌

瀟湘聽雨錄卷一

廣陵江昱賓谷著

湖南天氣寒煥不常一雨則涼一晴則亢夏月多晴而旦晚則涼餘多陰晦衣服黴醜時用香篝況山重水複地又沮洳乎

衡湘間多轄神祠廟詢之人士皆不知爲何神但知司牛爲牛禳祈而已案天官家言長沙分野翼軫軫旁爲左轄右轄牛以服車然則神祠之建正南人祀其分星爾

乾隆丙子初夏在常寧署雷雨暑後民居山牆擊去一

角咸云先已被擊此其再矣蓋遙對聖廟大成門爲神所憤爾其家不之信復整飾如初至秋雷又擊損壞更甚今始懼而改去矣

他處夏月天欲雷雨黑雲滃然往往見龍尾蠕動俗云挂龍自入南楚每天色欲作暴雨詢之士人鮮有經此者

先時而雷湘楚常有之其咎亦不甚想天地近南陽氣易發也

吾鄉秧苗旣發重拔而藝之率以三時爲定候夏至三日爲初時五日中時七日三時其次則三時以後十

五日曰浪蕩時凡在時中得大水男婦冒雨徧插否
則不發一歲收成全繫乎此若南楚夏至將成穀矣
問之老農亦不知有三時之說

軫爲楚南分野桂陽入軫六度長沙入軫十六度然桂
陽地距長沙六百里山水迂折以句股法得弦四百
四十餘里而度數相懸逾其十耒陽古桂陽屬縣衡
陽古長沙屬縣今耒陽與衡陽接壤何至耒陽入於
六度衡陽卽入於十六度乎若云一度中有分秒之
限則觜二鬼四度數之少何以分應郡縣之繫且中
國之在宇內特百分之一寄象鞞譯之境將何星以

主之至一行兩戒之論云星土以精氣相屬不係平方隅其占驗以山河爲界不至於州國此亦強解躔次參差州郡錯互地與天之不相合爾其他疑竇多端終難盡泯也

乾隆壬午大雨常寧廟前山高下忽涌水凡百餘處流成深痕沙皆白色淹沒田廬人畜甚衆初傳爲出蛟旣視之不過徧山皆孔穴沙流成痕如裂並無坳塘蛟發之迹山後爲桂陽州境桂陽人則疑爲常寧山崩究不知何異也大令朱君永烈言

南楚六月初早稻卽熟民間獨重食新不必有田之家

各擇吉日置酒脯炊新穀祀神薦先然後招親友宴
酣微論貧富至是日必輟業謂之嘗新人皆稱賀其
日用辰巳以龍蛇不食穀米也其饌用魚忌雞餘饌
音相同也重農敦本其俗極厚秋祭曰嘗於禮亦治
嘗秋夜宿上封天月明淨忽簷溜疑雨達曉乃止蓋鐵
瓦不受繁露故也此種景況固塵市所少

南嶽之雲變態百出時而一縷來去時而滾滾入室時
而鋪海則衆山俱沒一望平洋眞屬奇觀

洞庭實陸地非滙澤之湖可比衆水所會而瀟爲長海
歲夏秋蜀江漲過湘波溢而爲湖廣延五百里日月

出沒焉君山宛在水中霜降水落澗爲平野山復居
陸誠所謂唯餘一條湘川而已其野卽禹貢之雲夢
雲近長沙故長沙謂之雲陽華容縣乃古之夢近楚
郢春秋定公四年十月楚子涉睢濟江入於雲中昭
公三年十月楚子與鄭伯田於江南之夢周禮以雲
夢爲藪澤爾雅十藪此其一焉司馬相如賦謂雲夢
方八九百里是已莊子黃帝張樂於洞庭之野其非
巨浸明矣余自丙子夏日一渡其餘往來盡在秋冬
所爲氣烝雲夢波撼岳陽壯濶之景僅從岳州至磊
石一帶百餘里閒領略而已

洞庭湖中九月水落往有大船遇淺不能行水漸歸槽則船在高岸矣上人謂之守洲船以爲湖神所爲必至次年春夏水發始行利市百倍嘗有一人性傲不信此說遭淺卽拆卸復造入湖復淺如故終不信舉火焚之其人因而貧窘以死亦殊可怪

楚說文叢木也一曰荆禮學記夏楚注楚荆也案夏卽榎亦可爲刑杖詩小雅楚楚者茨言抽其棘注楚楚茨棘貌檜風蜉蝣之羽衣裳楚楚注楚楚鮮明貌如荆木叢生而茂也借爲痛楚被夏楚而痛也南中荒僻多生荆楚故楚之始入春秋曰荆後曰楚尚書爾

雅周官等注疏就字義牽合都未及此

王霍霖衡湘稽古隨縣厲鄉南有重山卽烈山也山下有穴神農所生處都長沙號厲山氏以長沙爲厲山國或曰帝母安敦氏將產野燒騰發萬山然烈其宅爲焚母奔厲山處穴中生帝故名烈山氏秉火德長沙正南離火之地稱炎帝以火紀官後葬茶陵至宋割茶陵地爲酃縣今隸衡州府以故酃縣康樂鄉有炎陵自帝承以下俱兆於此

衡郡城東十里酃湖乃漢時酃縣地今酃縣宋嘉定中析茶陵地置襲古名爾

鄰人言炎帝陵凡遇祭告則數里之內有聲殷殷若雷人皆聞之如此數日禮畢而後止守土春秋祀則否詢諸鄰令周君仕魁云莅任已兩遇祭告無不共聞殆猶孔子盛饌變色之意與神聖靈爽久而愈赫如此

稽古云嘉禾縣故禾倉也炎帝之世天降嘉種神農拾之以教耕作於其地爲禾倉後以置縣帝子柱爲農正躬勤耒耨與小民同饗殮當未知稼穡時故身親畎畝後許行以楚人習聞神農教乃爲並耕之說不通於時矣

呂氏春秋朱襄氏注以爲炎帝別名故衡山爲朱帝游
息地有朱陵洞天衡郡合江亭右有朱陵後洞云可
通衡山之朱陵洞天今後洞中徧滿題刻皆郡人爲
子女祈禱之詞俚語俗書疥壁幾無寸隙閒有一二
係前明年月案韓詩孫注及范石湖遊記胥稱唐人
題名想孫范當時所見亦此類多未審爾

湘楚往往有水神丁三郎廟不詳其始末衡湘稽古所
言極明略云春秋鉤命訣神農氏之臣有丁謀華陽
國志古有力士五丁開蜀山衡湘傳聞以火紀官取
千支六丙六丁分方治水鑿山通脉故道書尊陰官

六丁神韓愈詩有天官敕六丁之語爾雅歲在丁曰
彊月在丁曰圉通水欲彊蓄水欲圉皆以水取義丁
丑氏治東北丁卯氏治東丁巳氏治南丁未氏治西
南丁酉氏治西丁亥氏治北蜀西方丁酉氏其次居
五故謂五丁秦時通道蓋其子孫衡湘南方爲丁巳
次三故今水神稱丁三郎民間凡有疏鑿大役必椎
殺九牛十八豕以丁巳日祀丁三郎謂之怪犧春秋
元命苞炎帝之臣曰怪犧是也案此亦慈緯家說然
如此確鑿固足立言不朽

稽古云衡湘神農故都故其山水每以田事制名赤制

氏作耒耜于郴州之耒山故水以山名縣以水名赤
冀作杵曰於舂陵尚有遺曰存焉故有舂谿舂陵鄉
又作機杵卽今水碓故酃縣有沫水

山海經戲器生祝融降處於江水管子祝融辨乎南故
以爲司徒論語摘象輔黃帝錄皆作容光衡山祝融
峯一名容峯見水經注容路史作庸非路史庸光辨
乎南而正夏黃帝代炎而有天下庸光猶是其子姓
故封於炎帝之故都其故國之號當除改厲山曰江
水考史記元蹕降居於江水是爲青陽漢書鄒陽傳
注青陽長沙縣也又名雲陽今長沙府北有青州雲

田傳爲青陽雲陽故地容光所居案此乃衡湘稽古
說霍霖欲張其鄉土意主炎帝都長沙其實世本載
炎帝都陳後遷曲阜也

楚語顓頊命南正重司天以屬神命火正黎司地以屬
民案今衡州城西有重江南有黎江重江鄉有重亭
漢置重安縣是皆因人以名之也又案重黎明屬兩
人據左傳重出少皞犁出顓頊犁卽黎字異文乃荆
州記言衡山之南有南正重黎墓竟作一人得無沿
誤邪

堯時羲和漢晉諸儒皆曰重黎後裔今衡州城西重江

鄉有義田鋪有山曰義和山俗以聲誤曰雞窠山周
百里山盡赤蓋離火之正位義和故墟也

山海經句龍生二子長噎鳴噎鳴生十二子以十二歲

名之故武陵有辰水酉水酉水東逕酉陽縣故酉陵

酉氏之冢也有大酉山小酉山小酉穴中有書千卷

酉氏好書所藏也單闕卯也今湖南多單丹姓與單

善善姓各族異音或卽其系又案單卷堯師武陵枉山

有單卷壇應山有單卷墓皆作單吕氏春秋作善豈

單丹單善善三字本通邪

史記黃帝取西陵之女是爲嫫祖帝周游時元妃嫫祖

死於道案爍晉語作雷故今峒嶺有雷祖峯上有雷祖冢謂之先蠶冢峯下地曰西陵蓋西陵始爲蠶後人尊祀之曰先蠶俗遂譌以仙人嬾殘大謬嬾殘釋子不應稱仙卽佛號金仙亦北宋時崇道貶釋之語非世俗通稱而仙殘二字亦不容捏合況嬾僧事見甘澤謠其後爲虎銜之而去不聞有墓也

槃瓠是人非犬路史駁之極爲明切乃今衡永諸僑畧於歲終祀其始祖爲犬尸扣槽羣噪以爲禮自誣孰甚且據隋地理志長沙郡有夷蠃名莫僑自言其先祖有功常免征役故以爲名是衡永之僑當時方自

諱其爲槃瓠後今乃作此形徑何謂哉至廣韻莫徕
字俱作犬旁謂爲狗種與隋書異特沿舊說牽合一
家爾

徕不出痘染者多死極信胎毒之說婦有身夫婦卽不
復近一家中偵伺惟嚴或有不戒衆共斃之蓋其俗
男女同寢一處旁人易察故也

善化縣南六十里昭山明一統志昭王巡狩登其山其
北昭潭或謂南征不復卽其溺處案膠舟事在漢沔
閒此非其地衡山下陵廟或湘人傷之爲衣冠葬於
此而立廟祀邪

衡州雨母山漢郡國志所載其迹極古距城南二十里
蔗畦嘗過之有廟尚祀帝嚳叢柯隱景巒阜隆深舊
碑無一存者問赤松子壇道士莫對殿北峯巔有大
石甚高方廣三丈俗稱飛來石沿誤之久掩其故名
猶麓山之石俗亦但曰飛來而不知爲拜嶽也蔗畦
慮古迹之湮爲題赤松子壇四篆字磨厓刻之

衡州郡城西永福鄉三湖町烝水北岸地勢平行墟壘
繫布土人稱曰天子坪不解何迹衡陽縣志疑爲鍾
武城故址非也鍾武城在武水之濱距此甚遠且亦
不當號天子也王霍霖嘗詣其地以繩尺量度以爲

密邇衡山之陽是古時南巡狩之明堂基雖年代邈遠坳垺頗多而廣袤高下及左右壇坎之迹猶可髣髴未盡泯滅其諸壘則列侯所宿之壁壘也其見極
躔

禮檀弓舜崩於蒼梧之野史記舜南巡崩於蒼梧之野歸葬於零陵之九疑案太史公似疑蒼梧在粵零陵在楚相違太遠故分言之不知九疑山盤基蒼梧之野蒼梧甚廣壤交楚粵非兩地也九疑今寧遠治九峯競秀九水環流竹樹森蔭人迹罕交遊者空翠拂衣虛籟盈耳恍置身羲皇以上不復知有塵世事陵

前古杉十四株蟠拏屈曲枝柯連理明時代其一以爲學宮輒有風雷之異也

舜崩蒼梧葬於九疑出自戴記遷史不爲無稽然禪禹以後何復巡狩是二天子矣且唐虞之制歲周四岳總在千里之內何南嶽獨至三千里之遙蒼梧且極南嶽之南無怪古今駁者之多矣至漢書謂南征不反世紀謂南征有苗桀之俱在倦勤之後更不足辯然則九疑之葬果何爲邪唯郭弘農說其理可通最爲善解略云帝王冢墓皆有定處而往往復見者蓋以聖人久於其位仁恩洽及至於殂亡四海若喪考

妣無思不哀絕域殊俗之人各自立位而祭酸哭泣
起土爲冢是以所在有焉亦猶漢氏諸遠郡國皆有
天子廟也

常寧縣北宜江口西岸石壁半屬鑿去出湘口其石乃
悉在江中方正成疊與岸石不異相傳爲禹鑿石余
案水經注稱衡水縣南印石其方如印纍然行列者
得無類是但岸無鑿痕爾

義帝冢在郴州儒學之右冢頗高大有自生樹一二株
前爲祠祠外有何文簡碑冢中白虎因而名郡詢之
州人亦不知矣

鍾武漢郡國志曰重安侯國故鍾武永建三年更名是重安卽鍾武但易名稱而無兩城兩地然水經注承水逕重安武水入焉水出鍾武縣西南表山流至鍾武縣故城南而東北流至重安縣實分言之

鍾武縣其迹雖介隱顯閒然水經注所云武水入焉水出鍾武縣西南表山者在今衡陽縣長樂都三峯如表今樂山橋之水是也或云渣江上三湖町有古墟卽鍾武故城其實考水經注之語則鍾武當在武水之濱而今之陰陂西渡閒正可作縣場至于三湖町之墟壘四方寬廣不足三百丈必無如此之小城考

古者以爲古帝南巡之明堂基土人至今猶稱其地
曰天子坪其非鍾武故址蓋較然矣

渣江在衡陽縣西九十里入於烝水命名之義莫考幽
明錄載吳時葛祚爲衡陽太守境內有大查橫水爲
怪民爲立廟行旅禱祀查乃沈否則查浮船壞祚乃
大具斤斧謀去民累其夜聞江中洶洶有人聲往視
查已移去自此行者無患案此或其義至水旁則屬
妄增乃衡人積習爾

水經注湖中君山東北對編山山多簾竹案此山余嘗
過之今俗呼扁山蓋以聲相近而誤山甚小湖水所

嚙洞穴望之前後相通儻在陸地瑣屑不足名爾其上童然惟麓稍有叢竹未知中簷材否也

衡州城西有伊山又曰桓山上有桓伊讀書臺豈子野舊所逕涉故山流其名邪

湘中記載略塘有銅鈴神聞鐘鼓聲則水變綠魚爲之飛案略塘在衡州西鄉有銅鈴廟銅鈴不知何物揚子方言龕受也齊楚曰鈴是鈴卽龕爾銅鈴廟城中亦有之

丁丑夏遊浯溪有窳尊亭址心竊疑之蓋次山所稱窳尊在道州左湖東山巔乃爲亭其上刻銘爲誌今浯

溪於浯臺之巔鑿一圓迹深二寸許徑六七寸鑿痕
宛然銘亦不見自屬後人所爲王新城浯溪考削去
不載極有見表表遊記乃云次山所鑿漫不加核

北夢瑣言載乾寧中書生張璟至衡州犬吠灘爲廟神
草奏事頗詳今衡州湘江十數里上有狗亂灘甚險
水聲如吠土人呼喧聲曰亂其卽犬吠之沿誤乎

酉陽雜俎謂衡山無棘唐稱衡山正指衡陽昨分縣命
役取棘衛牆至爲難覓余嘗舉此言以證之蔗畦以
爲善於解朝

邵陽名起于唐其初則吳孫皓置邵陵郡邵之名始見

乃邑志謂邵召字通召伯所巡行其地爲古南國附
會已屬牽強至云所遺甘棠明初始伐之百年前樹
兜猶存則令人絕倒矣樹根曰兜蓋土語云

濂溪在廬山下周子始名之謂在道州者妄也李穆堂
宗伯極辯之愛蓮說鄭東里太守之僞謂意義淺俗
氣體卑弱絕非通書太極文字有辨甚晰今湖南州
縣往往有愛蓮池亭且有載入志乘云昔周子愛蓮
於此者可笑之甚

瀟湘聽雨錄卷一

瀟湘聽雨錄卷二

廣陵江昱賓谷著

古今詩話云慶歷中有閑人遊嶽謁主簿郭及甫視其刺羅道成也自言郴州人問郴人言有真人乘白騾行石壁上迹至今存案石壁在州城西南三里許余嘗過其處少憩但路亭一坊大書曰駱仙嶺得無以乳爲穀亦操土音乎

常寧縣城外雙蹲書院左爲學宮舊基面臨宜水際水有巖因土名不雅馴康熙閒縣令張菊人芳爲易名曰學巖相傳巖穴深不可測磨厓爲宋人題名字大

約五寸多漫滅可識者令□丞□巡□□□嘉佑三年□□放舟同遊云云巖上舊有亭基蔗畦爲書學巖二字碑立於上

雙蹲書院距城南里許院後兩石對峙若蹲距然石上八分書題刻雙蹲二字宋王居正襲益卿讀書處王師南軒襲師朱子皆常寧人明時建書院其地蔗畦至爲之捐給膏火延師課士稱盛

石鼓山朱子題爲一郡佳處好事者品目爲八景曰窰尊藏雪山下有石中空凡雪涉春始化曰孤藤夾岸潭下有藤由西岸牽至東岸明時漁人於水底見之

曰枯枝映月書院西一樹半生半枯月映晶光如玉
吳逆伐之曰寒潭濯足亭曰真仙遺迹七賢祠右石有
有遺迹明時建濯足亭曰真仙遺迹七賢祠右石有
仙遺迹曰靈洞昭感四方祈禱洞中徧刻姓名曰
石鼓兵占石鼓鳴有兵革曰縣崖曉曰東巖初曰如
金愚案石鼓如西谿崖閒唐宋題刻皆真確不磨之
迹反不之及而徒侈水底之藤半枯之樹以及荒唐
足迹層見疊出殊覺近俚然卽此標識亦可想見當
時石鼓之勝

衡郡花藥山志稱黃葛鍊藥于此五色禽棲于牡丹樹

下宋寶佑五年建寺友人云今殿上一碑述住僧瓊
俊爲宋高宗弟遭刑州郡守盧景魁逮繫獄潛命獄
卒王佑馳書叩闕有旨罪盧族誅卽授獄卒以郡守
改刑州爲衡州云云僧書帝旨鄙陋不經公然大書
深刻令愚夫婦指說贊嘆據爲典故予初不之信及
往觀之不覺絕倒

李忠節芾故宅原在衡郡城中後爲郡學因建祠學旁
以存故迹明初以學改雍王府遷學於西南卽今學
地忠節入主鄉賢祠而專祠不復建乃建於石鼓山
與武侯祠相並蕭蕭丈室已爾今不知者輒指石鼓

爲故宅矣夫城中故宅旣不可復播遷城外僻陋數
椽已嘆削也滋甚乃群主輝煌鴈次排列忠節一主
幾無容處詳視之無非數十年來郡守之長生位考
諸治績不但非龔黃卓魯且猶有被人指摘者先後
山長爲曠岫樓太史敏本李振南明府繼聖林半霞
太史學易余皆與言之浩歎而已安得有力舉而投
之烝流之濁

直釣巖無械仙翁隱處在耒江上游九十里舊名鋤雲
洞今洞門有 國初人題曰飛龍洞洞內穹敞石乳
四垂秉炬而入其石有天然龕座獅象龜鼉鸚鵡鸞

鶴之類又有雲則縹緲層疊田則畦棱井然水則蹙
皺如波紋滉漾中行若牀者傳爲龍所蟄也隔一竇
透光若井石質滑瑩直上千尋俗稱通天塔謂龍由
此上昇也多蝸大六七寸見火炬輒拍拍散飛右一
洞若房隆冬煥如可釀酒云洞初爲江沙淤塞明天
啓初道士采藥見有一隙蒲伏探之因而䟽剔近水
一石壁洞靈源三字署爲漢佐張良書未暇深考又
浦南佳處四字元至正六年李從善書又一詩爲宋
進士李芮字秀穎號夷白作詩云無械仙翁去巖垂
直釣名重開茅葦塞仰見斗山明便覺天光近從教

俗眼驚登臨試一覽心目得雙清乾隆壬午春兩過之因紀其槩

觀音巖在未陽東潯江之濱巖高峻如寶幢爲閣七成緣巖構架而上石洞層折如螺有生成觀音像明永樂間未令王道赴任時夜泊洞庭夢女子曰吾潯江女也屬君明旦勿渡湖次早果大風行舟胥溺道以夢獲免下車索謁至今香火極盛

燕泉在郴州城外里許何文簡以之自號有記載餘冬敘錄嘗過之池亭都廢惟野田積水一碑署燕泉而已

壬午春從吳雲巖學使案試永州旣竣莊謚菴明府邀遊西山余適以畏雨不往雲巖云乘興而來忽焉終止歸時何以誇愚溪澹巖之勝因訊以詩云深韜采筆坐書城分付流鶯自在鳴莫是爲他遷謫地不教更占柳侯名余答云看山得得向芝城無那山鳩逐婦鳴比似劉伶雖不醉當時何害酒爲名

永州山水昔所心慕雲巖相招至再壬午春同往試竣適以別屬期迫其興遂闌故雖澹巖三十里之近亦不欲往次年太守朱龍坡先生瑛知之雅欲爲余裝糴以償夙契招邀甚力時將謀歸又不果往筆之于

此固見太守雅情亦見余于山水閒非乏勝緣實則勝情終短爾

鴈飛至紫蓋峯必回頭載飛而後過土人謂爲朝嶽嶽志云紫蓋峯有石刻回鴈峯三字發於土中湛甘泉遊記祝融嶺爲上回鴈峯余謂南嶽七十二峯清泉占其五而弁冕一峯尤爲名勝奈何又被此種議論橫爭邪

東洲衡郡城南湘水中嶼也竹樹蒙密田園鱗次居民數姓自爲一邨風日閒美覺武陵源去人不遠上有藍宇爲崇禎甲戌桂藩功德雖頽垣折檻尚足見營

繕之工朱邸裝嚴非山臺野邑可比老桂二株大皆
合抱銅彌勒像模塋精好見者生歡喜心乾隆乙卯
冬偕戚友及子姪輩放舟往遊今蔣豈石大令一璉
奉其尊人遺命倡建書院蔗畦爲作碑記

錢邦芭湘水考云湘源廣西自全州而下至楚南永州
與瀟水合曰瀟湘歷祁陽合桂陽諸水至衡州石鼓
與蒸水合曰蒸湘其出武陵會長沙諸水逕湘陰入
洞庭者曰沅湘此所謂三湘也以湘鄉爲上湘湘潭
爲中湘湘陰爲下湘從邑而不從水失其旨矣其論
似別

自衡至永郴桂山路險峻一倚陡絕之壁一臨芒刃之淵仄徑單行日程不及百里行旅多乘竹兜大吏輿僮不能用另備竹轎不過投竹兜稍大而有帷蓋爾至於夫役一縣備數百人馬亦不止百匹每一往返騰嶮降深夫馬死傷非一尤險處引曳肩舁者則曰牽夫蜀道之難亦不至是

衡永驛遞最畏日行五六百里公文蓋險仄陡頓單人弱馬設遇風雨暮夜必不能一時之頃行四五十里也近幸嚴禁非不得已無許限五六百里字樣然地屬衝途五百里限勢所不免六百里歲亦多有也

楚南之俗山不名山而名仙者比比蓋神類稱仙山有神祠輒以仙代山

祝融爲南嶽主峯極高峻拔地九千七百三十六丈曠峒嶠太史有句云諸峯膝下羅孫子四嶽天涯老弟昆一時稱傑

登祝融峯頂則七百里之湘江近出足下一達官登峯舟楫迎面而至艷然怪有司不禁曰何物舟船敢衝突不避屬吏相顧匿笑

柳毅爲涇婦傳書洞庭君是洞庭故有主者今湖中洞庭王廟爲冕服王者像是矣乃竟有塑巾服像者曰

爲柳毅而號爲洞庭神豈水藏龍宮亦效唐虞故事
鰲降之後遂爾禪受邪流俗不考如此

東安道中石壁斗絕不可攀陟其上有木匣曰兵書匣
周沂塘來謙云此何足奇蜀中有此舟上望之風時
動葉爾

沈香巖亦在東安距兵書匣半里許壁上舊有沈香一
段今支木尚存

辰州江濱山厓閒有壺若酒瓶舟中望之晃耀如銀殊
不可解人因名此爲銀壺山荆銘三孝廉自新云假
使人可置也斯人可取矣終古猶新所以吾鄉人有

神仙幻語

瀘溪江岸峭壁千尋上有屋宇碓磨罌缶日用之具無不備連亘絡繹凡數里儼如市井土人云閒亦傾圯然不覺減少但俱構縣崖人不能上不知所道少陵云廣廈千萬閒香山云疲人無處居使二老見之豔羨奚似

清江城東九十里有麥園洞宏敞儼若廳事左石室二右橫衍如廊廡中有石似人偃臥曰睡仙別有石榻長八九尺其上鍾乳四垂種種名相壻泉流成細溝幽穴潛入遠至洞外半里許山壁閒出左右引裂以

周田溉霖雨水漲則有魚從泉出或謂洞內微津自石閒滴瀝何因有魚必潛入處乃深潭也右壁一穴僅容僂身篝火入入者數十步輒以紆幽無所見而出至後穹頂一牕豁然開朗照徹一洞殆別有天焉洞本無名因其地皆種麥故名又城東百里九蓮峯後稍左山上有桑田洞凡三重秉炬而入寬廣容數百人鍾乳下垂望齊冰雪復由一徑若峽曲折而入俯臨幽谷石勢崩剝別具異境再入廓然開朗其上石平如砥高僅舉手旁一小竇劣可通人不能窮其所至也凡茲幽勝皆以地處僻遠僅供里人遊覽世

太書太極太字必不用點而讀爲大真屬不解以及
江張吳胡王黃營雲訓順近正邵段學若極其同音
無別而亨讀鏗青讀槍整讀梗墓讀夢樂讀羅石讀
霞成姓讀咸易姓讀亞土音之譌又無煩深責矣

崽本山皆切或讀若宰揚子方言江湖閒凡言是子謂
之崽案今湘人讀宰乃音不殊而字異作樊因而書
貓作𧆦又小兒通稱則曰倅仔倅音來上聲仔音近
齋上聲蓋子音之轉也呼最後之子曰晚因而有魍
字他如隱入曰闐音鑽平聲一段之半曰𠂔音顙代
言曰𦉳音倩大步曰𦉳音跨

南楚問年皆對以歲名苟非士夫不甚了然於歲數也
又稱慶者必閱十歲又一此猶香山詩已開第七袞
行開第八袞之遺

衡人崇信雲霄神稱以娘娘家置一像每有所禱召巫
鳴金鼓吹角作諸戲且云神雖女人身而好聞褻語
於是巫者呼唱猥惡之言至不可耐而男女聚觀譁
笑不止如此則神樂必降福衡陽縣志極斥之謂原
名營魁山野精魅能營錢營米者也土音營雲無別
因飾其號爲雲霄爾

楚人尙鬼惟衡則家祀雲霄又有所謂鑿神者於庭隙

覆一盎而闕之以爲門中奉神位去洩溺之處無幾
晨夕香火跪拜若童子戲以至官署無不有廟清泉
建署時咸議立廟幾若倉庫廨宇之不可缺余獨持
不可此無廟之署殆楚南僅見

楚南禳解疫癘巫覡辭章皆豔稱揚州風土之美有酒
又香肉又肥之語撝金伐鼓縛船送之嘗聆其祝詞
吾揚雖盛奈何爲楚鬼之逋藪乎沂塘云遯齋閑覽
謂湘潭方廣寺四月朔日在東壁則照見維揚官府
樓堞民舍影著壁上並此送鬼事觀之一則附楚於
揚一則招揚入楚揚爲楚歆羨若此

符咒寄刑之術辰沅爲甚其實湖南在在有之受刑者
每預爲作法飲水而有驗有不驗至於化鯁消癰跌
撲損傷之類則應手而愈嘗于訟案中屢見其書同
一傳本無異其符則春蚓秋蛇其呪乃土音別字蠻
方鄙誕之談令人一見欲歐始悟其術惟本地通行
過湖則不驗者蓋岳州以北則湖南鄉談漸改爾
相傳衡郡花藥寺大殿不集灰塵蛛網常寧湘山寺殿
上木枋爲公輸遺迹至今不受采二處皆常到姑志
於此

瀟湘聽雨錄卷二

瀟湘聽雨錄卷三

廣陵江昱賓谷著

親耕之禮始於神農路史槲天作扶耒之樂是也案槲
天槲人因赤制作耒耜於槲天乃爲扶耒之樂以獻
於帝或曰伏羲樂扶耒又鳳來神農樂扶犁皆以音
相近而誤且以屬之伏羲獨不考槲天爲何世邪

家令君居衡最久蓋梁末流寓嶺南時或至此也有衡
州九日詩云秋日正淒淒茅茨復蕭瑟佳人薦初醞
幼子問殘疾園菊把黃花庭榴剖朱實聊以著書情
暫遣他鄉日翫詩意全家留滯非偶爾萍蹤可比郡

縣志曾不之及故輯清泉志特載之

李善據唐書江都人且云初江淮閒爲文選學者本於曹憲而同邑李善等繼之然稱江夏李善者亦唐書也杜八哀詩作江夏李公邕邕善子也是善又江夏人矣今武昌洪山下有修靜寺爲邕故宅寺後石壁邕題字猶存

平江有小田杜氏族稱少陵裔家藏唐宋誥敕二通唐敕云敕襄陽杜甫爾之才德朕深知之今特命爲宣議郎行在左拾遺授職之後宜勤是職毋怠命中書侍郎平章事張鎬齋符告諭故敕至德二載五月十

六日宋敕爲紹興三十二年授杜邦傑者明時參政
陳壇跋云嘉靖壬寅駐節平江閔縣志載敕尙存於
縣市民杜富家亟命求之唐敕用黃紙高廣皆可四
尺厚如錢字大二寸許倔而勁年月有御寶方五寸
許色轉沈中有碎裂而全者皆爲蛇紋矣宋敕用白
綾字用行書類今所傳高宗御書或當時宦官女史
所習也案唐書子美困客耒陽而卒墓志云旅殯岳
陽四十餘年孫嗣業起柩之襄耐於偃師然則平江
之杜何自來哉且子美二子宗文宗武宗文早世宗
武病不克葬其父以命其子乃終歸葬於偃師若宗

武遂家於岳則子美之殯不終歸矣或此後子孫復流寓平江未可知也

臧玠之亂見於正史至衡州刺史楊濟出兵討之則見杜詩注少陵在潭避亂來衡蓋得之親歷實可補史傳之所不及

龐居士蘊襄陽人隨父宦衡故衡州蹤跡最深唐書直曰衡州衡陽人必非無據或稱枕刺史于嶺膝而化則嶺固襄陽刺史也豈蘊之終又在襄哉未暇深考曹松字夢徵天復初及第同王希羽劉象柯崇鄭希顏皆七十餘時謂五老榜撫言載松舒州人乃雅言系

述謂爲衡陽人今衡陽志載之

石鼓西谿石壁有劉莘老祖孫題名莘老題云劉摯莘
老來遊跛躄侍其孫題云後百八十三年六世孫震
孫蒙恩來持庾節拂拭舊題不勝感愴寶祐二年秋
九月旦其左又有元貞元年史杲題名又左有大德
十年橋齋史燾拜觀舊題二行蓋效莘老祖孫題爲
之也杲燾元史無傳考鄭壁呂仙亭記有橋齋史右
丞疑卽燾爾莘老與跛俱見宋史案震孫字朔齋淳
祐中知宛陵吳丞相潛方閒居震孫日陪午橋之遊
震孫後以召還有詞留別詳見齊東野語莘老祖孫

題字嘗搨之裝爲冊與蔗畦及兒子德堅從子德量
爲詩題之寄京師王西莊光祿鳴盛錢穉石庶子載
辛楣侍讀大昕朱竹均編修筠韋葑仙編修謙恒曹
萊嬰編修仁虎吳冲之庶常省欽趙璞函舍人文哲
皆爲題詠

柳應辰於浯溪有題名有詩歌題名爲熙寧六年癸丑
通判永州時書其下作一字如丈字相傳中興頌危
石爲怪山僧以告應辰以朱濡筆衣冠坐舟中至夜
怪至伸手入應辰以筆押之詰旦字迹在崖石怪遂
絕明年爲熙寧七年甲寅復大書前押鐫中興碑左

高崖上字徑四五尺題云押字起於心心之所記人不能知云云且系以詩有向後有人來屈指四千六百甲寅年之句土人搨以辟邪遊者雖不得顏元諸刻無不求柳公心記致爲之說者推算統元歷數以附會之謂其精於易理余謂此特好尙後名欲於勝地圖不朽而顏元在前殊難爲繼因而別施狡獪使人疑詫爾況零陵志道州志俱載此事另有其地源委亦小異各據爲古迹可知其妄又況文昌雜錄載應辰判鼎州時言魚鰾法用倒流水吸其人氣入水中面東誦元亨利貞七徧飲之卽差可見其好爲符

咒厭禁之事矣

衡陽學傳爲鄭向故宅濂溪周子少依舅氏於衡今學
前且有愛蓮池亭考宋史向陳留人並無衡州蹤迹
又年譜少孤依舅氏自營道入京師亦非衡陽不知
其說何據惟縣令王亞夫屬湯漢作先賢祠記漢述
亞夫之書曰鄭向則家於是邦者也亞夫漢與向特
代相去未久漢又郡人擅文名不應無考故輯清泉
志於學校類存其說人物選舉類則徑刪之

宋史忠武傳有楊么本名楊太太年幼楚人謂小爲
么故曰楊么余謂豈特么非名太亦非名衡湘人稱

大必太音且書大作太字想草竊之冠初無名字從
其生之次序名之則曰大從其幼小名之則曰么皆
鄙野率漫之稱爾

趙忠定汝愚謫永州韓侂冑屬衡州守臣錢鏊害之暴
卒衡郡有趙忠定公祠康熙間趙恭毅碑記謂宜引
苗忠武祠例鐵鑄侂冑及鏊像跪於中庭令人得而
詈辱之其論殊快惜無人爲之

寧宗慶元二年紀正月自庚寅日起至庚子書趙汝愚
卒於永州汝愚本傳至衡州病作暴薨時慶元二年
正月壬午也永州貶所尙未爲錯若庚寅至壬午一

月中豈不五十餘日乎謬誤極矣

衡郡開福寺在湘東岸爲趙忠定殯所舊於寺南立祠
今稱宣靈廟祀宣靈大王極著顯應香火最盛叩諸
長老云大王卽趙公豈公之忠不足俎豆千古必待
變易名號始能致愚夫婦之饗薦與

開福寺內舊有祠祀向公子恣今木主亦無惟碑尙存
乾道八年衡陽縣攝郡事王光祖題名在石鼓西谿有
新進士王居仁等是年由郡庠登科之語案居仁南
軒張子門人常寧人與同里龔益卿齊名益卿朱子
門人也常寧志載居仁登淳熙十四年王容榜進士

蓋誤也應以石刻爲正

新田志樂雷發字聲遠寧遠縣北鄉潭田人明末分置
新田潭田隸焉雷發長於詩賦累舉不第門人姚勉
登科讓第理宗廷試策對選舉入事賜特科狀元數
議時政不用歸隱雪磯號雪磯先生後復賜第及田
至今尙存案縣志科甲表自宋以來雷發家世科名
不絕稱右族焉今遇考試樂姓頗衆雷發所爲策及
詩賦載兩邑藝文志嘗求之其家有刻本亦止此數
篇又江湖集載雷發江右人豈其先自江右來邪
樂雷發詩南宋六十三家小集載雪磯叢藁五卷中有

題許介之譽文堂詩詳許玠字介之襄邑人南渡寓家衡陽晚年與江西曾無疑金華杜叔高九華葉子真同被召有東谿詩橐雷發又有常寧道中懷許介之詩戴復古亦有常寧縣訪許介之詩似玠又居常寧今常寧志選舉表有許玠殆卽其人

蕭德藻字東夫三山人紹興庚辰進士乾道閒宰烏程因留家苕上居有千巖之勝自號千巖其詩爲時所推楊誠齋云尤蕭范陸四詩翁是也方虛谷謂其詩有板在永州余乾隆壬午客永時嘗徧訪之不得又德藻瀛奎律髓作海藻意草書德字似海故譌作海

爾

宋史李芾傳曾祖椿徙家衡州遂爲衡人考椿傳歸老野塘上今衡州城北二十里尚有野塘鋪則椿爲衡人不止芾傳有明文矣

李忠節芾闔戶自焚見諸國史舊永州志載其浯溪讀中興頌一絕句羯鼓梨園迹已荒斯文猶在日星光我來細拂青苔石不憶三郎憶漫郎忠忱義氣詩才清婉若許

虞伯生集父參政井齋母楊氏見山文仲女見山守衡州夫人從參政與偕時未有子見山禱於南嶽已而

有妊將蓐見山晨興治事時尙早公服坐中堂假寐
夢牙兵入曰南嶽主者謁起肅之而寤聞兒啼乃集
生焉故小字曰衡集嘗言未婚宦時屢夢遊南嶽能
言其勝見歐陽圭齋虞伯生墓志

衡山何克明元延祐丁巳以雲夢賦中湖廣鄉試第一
今其鄉李丹峯宗棣謂克明墓尙存有後裔郡西鄉
族則其分支明隆慶時上高令名道從以來支系頗
盛余識筠軒文學啓良詩賦工擅可謂能世其家學
石鼓有七賢祠祀韓朱張及郡人二李氏及濂溪勉齋
也不知何時去濂溪主而易以宋大儒豐川葉先生

之主分縣以來詳詢莫得後檢明史葉釗豐城人弘治進士南刑部主事武宗立陳言忤劉瑾削籍歸講學西江瑾誅起禮部員外未聞命卒學者祀之石鼓書院云今衡守饒惕齋先生亦豐城人乾隆壬午郎君歸訪於葉公家藏有文集並石鼓遐思錄始得其詳蓋歸後來衡設教石鼓卽卒於書院至嘉靖二十一年入祀二十三年奉檄塑像與諸賢像並列二書乃其次子秩來衡衡人士爲之鏤刻者於是始改木主宋儒之稱並增濂溪之主祠榜去七賢之號稱先賢云

明衡陽劉大司馬堯誨總制兩粵時粵西八寨爲梗先是新建伯王守仁旋勦旋叛堯誨至調土兵定之酌善後七策磨厓紀功汪道昆文周天球書楚人重之與中興頌並嘗於其孫觀城文學處見之惜止一本不忍奪云

李廿鼃漢陽人萬歷中守太倉州廉能有聲罷歸將解纜有道士求附舟廿鼃納之行數日忽羣盜來劫不知其無有也舟中人惶懼失措道士徐起出雙鉞圓徑五寸許繫以銅索迭爲收放如電光閃爍刺二人於水餘盜遂散道士袖鉞前曰吾乃公部民感公廉

知歸途有驚願爲衛此去無恙矣公好自愛請從此
辭長揖徑去

按察御史劉熙祚南京人崇禎癸未流寇張獻忠據衡
州劉以死自誓九月二十七日題詩衡州官署而死
倥偬軍旅已逾年家室迢遙久別顏南北骷髏同作
壘湖湘官殿倏成烟鵲血不成無冢骨烏啼徧集有
孤田死生遲速皆前定堅此丹心映楚天又遠別鄉
關又幾年今顏非復舊時顏山川草木俱含淚貔虎
旌旗盡作烟老婦漫勞尋蝶夢兒孫切莫種書田萑
弘化碧非豪事耿此孤忠向九天案熙祚明史有傳

未及題詩事此詩雖未工其忠義之氣殆凜凜不可磨滅

衡陽陶經初大令易劄記云南昌徐巨源世溥崇禎進士鼎革不仕其戚鄒某延之家塾方入館途遇怪風攝之入雲及下見袍笏官吏迎曰冥府造官殿請題榜書聯世溥不辭往應之事竣冥主籌所以謝世溥請爲母延壽許增一紀又私向執簿判祈查已算判曰此正命簿也別檢火簿得之世溥大懼白冥主祈改冥主曰此天定也姑徇子請但還時須記明時日毋近火以避之世溥辭謝而還至鄒館人驚詫曰數

年何往兩輿丁久以疑案繫獄卅溥白於官得釋時
同郡熊雪堂文紀以大司馬改少宰家居治具招卅
溥飲勉就之酒將闌文紀以痞疾復發告卅溥曰古
有太宰嚭今又有少宰痞邪文紀不懌而入卅溥臨
去書千山鳥飛絕一詩於壁四句逆書之以句末乃
雪翁滅絕也文紀大恚後卅溥憶冥府言作石室於
西山裹糧避火時有刼盜橫行文紀遣人揚言於盜
曰徐進士窟重金於西山可掠也羣盜跡之以燒鐵
徧烙其體而死雖云數不可逃亦輕詆之有以自召
也乾隆庚辰委勘耒陽旱災聞大令徐介亭說卅溥

其族祖也

衡陽王而農夫之先世本揚州之高郵人明永樂初其先官衡州衛遂爲衡陽人夫之崇禎壬午舉於鄉後隱於邑西之船山因以自號卒祀鄉賢著述甚富潘學使宗洛訪其遺跡爲之立傳子歿故皆績學有文畝刻船山遺書正蒙註四卷老子衍一卷莊子解六卷思問錄二卷楚辭通釋二卷說文廣義三卷夕堂永日緒論二卷南牕漫紀家世節錄柳岸吟落花詩雁字詩倣體洞庭秋俟解前後愚鼓歌梅花百詠各一卷並經義一卷凡十八種蔣方陳文學一壠嘗覓

以畀余餘書惜多散失

漢陽李雲田以篤太倉牧世鰲孫也負才不遇縱遊吳越所至追歡買笑姬人寶鐙婢曰掃鏡相與博弈飲酒詠詩鼓瑟樂而忘反自號老蕩子合肥龔文毅爲賦老蕩子行一時名流皆有作其冊漢口王櫟門得之余嘗獲觀前輩手翰信可珍也以篤子序韓寶鐙出字原漢以丹青擅名

何璘澧州志云闖賊之死野史載通城羅公山明史載通城九宮山其以爲死於邨民手一也今案羅公山實在黔陽稱通城誤明史九宮蓋又在通山縣因通

城而誤有孫教授爲余言李自成實竄澧州因詢故老聞自成由公安奔澧其下多叛亡至清化驛隨十餘騎走牯牛壩在今安福縣境復乘騎去獨竄石門之夾山爲僧今其墳尙在云余訝之特至夾山見寺傍有石塔覆以屋塔面大書奉天玉和尙前立碑乃其徒野拂文載和尙不知何氏子徧問寺僧一老僧年七十餘尙能言夾山舊事云和尙順治初入寺事律門不言來自何處其聲似西人後數年復一僧來云是其徒乃宗門號野拂江南人事和尙甚謹和尙卒於康熙甲寅歲二月約年七十和尙臨終有遺言

於野拂彼時幼不與聞寺尙藏有遺像命取視之則高顴深頤鵠目蜴鼻狀貌猙獰與明史所載相同自成初僭號奉天倡義大元帥後復僭號新順王其曰奉天玉和尚蓋自寓加點以諱之而野拂以宗門爲律門弟子事之甚謹豈其舊日謀臣相與左右與明史於九宮山鉏死之自成亦言我兵遣識者驗其尸朽莫辨而老僧親聆謦欬其西音又迥異也爰臚訪聞備書俾後有參考云

僧石浪號破門能詩善草書爲懷素體本揚州人結茅於衡與樞巡彭禹峯而述友善彭有中秋前二日粵

署桂花盛開同胡方伯黃觀察衡僧破門飲詩云桂
林恰值桂花開難得相逢共酒杯萬里蠻鄉同作客
一城黃葉此登臺天邊宦迹僧能到嶺外秋聲雁不
來明月況臨金粟夜莫教漏鼓更相催

清泉東五十里地名方塘舊傳有姑婦爲兵所迫行至
中途同躍死塘中後屢見夢於境內之人自言姑婦
全節事其姓氏不可考亦不知屬何時而貞魂之家
喻戶曉殆有不容泯滅者亦可哀矣羅明經捷勝言

瀟湘聽雨錄卷四

廣陵江昱賓谷著

康熙甲子從祖辰六先生令益陽於郭外建十九賢祠
承先曾祖青園府君命也自周三閭大夫漢長沙太
傅遞至宋朱子真西山辛稼軒以及死難之李忠節
芾明提學蔣信凡十九人按昔五賢祠爲盛邑士啓
請先曾祖留像祠中曾祖命從祖啓辭之語義懇到
益人士至今能誦之啓云讀書而懷先哲擬置身大
雅之林祀古而志前徽肯自棄典型之外矧諸君共
推天生我詎賤子獨後於他人論守土無聞愧師長

之民牧幸過庭有訓凜臣職於子衷雖當耄耄之期
彌切冰霜之戒辭章服而勿製謂朝廷之優禮至
矣吾庸誇身首之榮慨賢祠之就頽懼草野之訓行
忽焉爾其爲庀鳩之策賴集士夫之嘉惠構成賢達
之美輪自周漢而逮元明姓氏輝煌於史策由文章
而溯忠義智愚景企其風規庶爲後學津梁非任迷
途後轍雖曰家嚴有命亦緣興志僉同乃時賢仰止
情殷直欲以長長者長我老在賤子恩斯念切甚願
以賢賢者賢吾親卻幸諸君及見其父不知臣父清
畏人知急難如郭解而不留義俠之名賑施似伏波

而曾無財產之積。辭薦揚於當道。不羨法真之世師。廣容接於士人。自晦李膺之風采。撫孤勸學。擬之希文。置田卽成分宅。無以踰茲慕德。向方卽使州宗叔度里頌太邱。篋以加矣。是皆鄉黨之所熟見。均爲大人之所勿居。今蒙雅意諄諄。愈退然其自抑。旋承訓詞。惕惕寧隱然而不揚。以祀典載在春秋。不舉惟長民之責。而學業本於賢聖。景瞻生事上之忠。旣奉身而許君。敢顧私情。以邀名義。況象賢以勵俗。可誇一得而銜家聲。雖一生無不可以告人。而此衷猶恐涉於阿好。且十九賢中。緊獨無父。難槩推其本原。卽紳

士大夫誰非人子欲獨隆其報答不能以一邑之痼
鰥爲己切懼勿以百世之指摘爲身憂儻違慈父之
惓惓何惜走南山南而北山北故申家言之懇懇願
勿泥見所見而聞所聞百代之禮樂斯存千秋之政
刑是式固非一時一邑之私論敢求知我愛我之深
情若云薄待其親賤子不敢辭其責乃或養不逮志
吾身將誰誘其咎乎謹啓

周藿園士儀鄱縣籍衡陽人今隸清泉所作野獲未見
其書其史貫乃蔣學使永修序刻今聞板又零失亦
不獲覩其孫命申文學能詩貧且老謀刻遺書卒不

可得

祁陽大令楊桐鵬玘言其伯氏若楸爲臨洮守赴任前夕夢至一處乃楊忠愍祠忠愍告以爲人所侮求治之入後又遇其叔立檐下欣相接遇道家常如平生及寤不解抵任後例謁忠愍祠忠愍曾貶其縣典史故也入謁果見有老僧象軸縣蔽于前因懲責主僧碎其象後堂祀關公檐榜浩然正氣四字浩然其叔父名也

桐城石曉堂爲衡陽贊府言其鄉錢旭昌需次都門夢一棺前和題云四川蒼溪縣令錢旭昌之柩覺而惡

之詢諸吏曹云地有任者未需代因而稍解乃選期
及而蒼溪貢缺旭昌恰得此縣乃大愁憂勸者譬說
百端勉強就道後閱八年果卒於任

衡陽大令陶君文登人言其鄉呂兆龍右掌黑而毛畏
人譏笑自諱之常袖右手一切事用左雖作字亦習
而安焉會鄉試隣鋪生有所祈丐兆龍忽遽誤出右
手生異而執之兆龍迫欲藏生執愈固急詢云君名
若有龍字今科必第兆龍道其名生始釋手賀曰君
必第且二十六名因告以元旦夢發榜諸名不可記
憶惟第二十六名下無字乃畫龍而黑其右爪今見

兆龍手有省云及榜發不爽卒之兆龍無他表著止於一第何所關涉而曲爲昭示若此

常寧彭月庵少時病勞瘵危亟一道士至門少憩家人告以病狀道士眎之曰此非鑿藥可爲我治之易易爾於是令扶病者坐牀上道士跣趺對之終日默然旬餘病者自坐不復須扶又旬餘飲食漸加久之諸病悉退如常道士舞去約月庵以月日至南嶽後山當有以授之至期父母不欲其往遂罷月庵愈後五十餘歲始歿嘗爲段君芝園永孝童子師芝園爲子言之

徐聚倫仁和進士雍正三年任衡永道衡州人病疫聚倫至病家摩病者卽愈後不及徧至用官銜關防帖病者門亦愈由是疫遂止見雍正衡陽志

清泉鄉先生風格之高者吾識劉省齋觀察良璧退居田里門臨湘水足不至公府惟以教子弟課農桑爲務初雍正甲辰第進士以才能榜下授官連江令歷諸羅龍溪擢南勝同知臺灣知府陞巡道艱歸服闋補興泉永道以病乞休所在巖疆海域十有七年燦有成績著震東紀略七卷其中因時因事經理權變皆素有揣摩之言非同倖中允足爲後人視效不獨

任閩海者所宜知也

清泉雁峯下輦圖巷洪姓妻爲狐所祟生一子狀若獼
猴頭尖身長三尺無胷脅渾淪如真木僅有左耳右
目左鼻右手左足手足指甲尖長如狐爪欲棄之狐
空中語曰汝家豐裕賴此子棄之使汝敗亡爰懼而
乳之長飼以飯不知飢飽不能行走間亦跳躑其家
以布絡之溲溺皆母提抱不能言語但呼叫若貓聲
見生人輒大叫惟母是依極畏犬生後其家畜犬無
故死蓋狐制之也此物閱三十餘歲而後死狐亦絕
迹至今洪姓夫婦年七十餘家頗殷贍初衡人駭異

往觀不絕久亦淡然不以爲奇婦孺皆能道之署中
劉媪與洪切隣習見之言之最悉

餘姚翁州守運標父大環邑諸生與友適粵泊舟祁陽
之新塘失所在同舟久索不得意必他往因返其行
裝越三年其妻以憂思而卒遺州守與兄運槐俱髻
亂旣州守籍邑庠同兄尋父留連湘楚其姊遣人召
之歸雍正癸卯州守成進士思父不已刺血書狀禱
神啓識得詩云扁舟風雨泊江關兄弟相看夢寐間
已分天涯成死別豈知意外得生還兄弟得詩喜甚
各敕妻子依外家女亦適人誓不見父不歸自浙之

粵備歷險阻無可之矣回至新塘於岸上古廟日夕
哀籲忽土人鄭海還者言及其弟海生昔年被溺憑
已溺之尸浮出因負至水次蘆葦內共葬之白沙洲
言其貌與大環符年月亦與大環泊舟時相合特日
差後爾海生之妻收得鑰匙囊是海生所憑之尸物
因刺繡工藏之未失州守兄弟遣使持歸示其姊果
昔年手製奉父者以故鑰驗之一投卽啓予以信生
還之讖應於鄭氏兩名而精誠所至靡不通也乾隆
八年州守爲武陵令十一年建祠於新塘旋擢道州
守距新塘更近歲得瞻拜人以爲孝感

清泉南鄉排山有朱世裔者結廬湘岸種植自給乾隆十四年九月百齡初度遠近醵錢稱祝約六百餘人室莫能容布席野岸世裔列上坐歡甚因言昨一鴻衣羽裳之客古貌美須髯贈以摺疊扇寘案而去追送失所在衆異之請見其扇無字照之內藏六字云三四公歸闔風衆亦莫解俄有他縣尉羅光泗者舟過見衆詢之告以奉百歲觴光泗欣羨登岸與世裔見世裔謀設席款之入內忽仆地亟扶之則氣已絕矣衆乃悟四公者俗稱縣尉之辭且其姓名皆有四字百歲之老於其臨盡預曉以期亦異聞也唐孝廉

傳殼言

常寧郭氏五世同居家無異財門無異烟一切秉於家督力耕者多閒有讀書應舉者近已二百餘丁將七世矣所居名義田地與人適稱云

湖南方伯楊公廷璋將陞見寮司公餞演劇爲三多故事中應有五蝠時忽有真蝠獨大飛遶方伯冠上良久不去衆以爲慶乃入都卽有浙撫之命未幾陞浙閩制府後且居端揆湘楚人至今傳其事

周易山湘東賈也有傭董常以積歲傭值屬爲存息後常老病易山以本息還之勸其歸常泣曰吾幼失父

母鮮兄弟依主二十餘年主家吾家也笑其歸本息
以酬主易山曰汝半生苦積吾義豈可受爲汝種福
田可常卒易山具衾棺以葬餘金告鄰里爲置田於
開福寺衆以狀白縣令蔗畦爲判牘背云董常積勞
報主無負於生前易山尙義薄財不欺於死後洵兩
善之濟美宜衆好之從公布地捨金非同佞佛垂休
勒石用以風時

常寧王霍霖萬澍少爲名諸生年三十棄業遊山水間
考訂湘楚古迹極有根據文筆峭潔嘗取正史自漢
已下有涉於湖南者仿綱目義例泐爲一書曰湖南

春秋自神農氏至秦不能編年別爲一書曰衡湘稽古惜多病年四十八歲而卒其書編輯至隋止其唐以下皆刺取而未筆削病中常以爲憾余以史家類以絕續而卒業解慰之易簣時屬其友李苦蟠如湘謂於余有平生知己之感屬爲敘之其家刻稽古以行春秋亦在謀刻未知能就緒否也

長沙湯君樹嘉儼居閩館巷一日庭中東牆頭火衆驚撲滅旋起於西又撲之堂室屏障衣履箕帚之屬靡不以次燄然數日間男婦皆在撲救之會但不爲災爾鄰人云火非一日矣初屋爲靈官祠地祠遷屋外

遺一樹屋主伐去且爲廁於上以厭之湯君召巫卜之果靈官爲祟乃毀廁謝罪於祠火遂止此蔗畦在長沙親見者

乾隆庚辰九月蔗畦在清泉設廳收訟牒有陽甲以強牽耕牛事稟蔗畦納之令應名而出乃甲忽若癡極口呼冤稱我名陽舜日求爲我申雪閱其訟辭竝無舜日名且不過牽牛口角何故稱冤因加詰問卽自稱甲本名如常若不知有舜日名者然察其神色有異放衙覆訊盡吐實情蓋舜日正月閒因田產求索陽克三及克三子正也爭執閒毆擊舜日至死舜日

無親屬止有母劉氏因舜日貧不能養久歸前夫劉
姓子度日克三賄求劉氏勿言遂將舜日尸棺掩埋
是舜日竟無一人爲之首告者甲舜日疎族正月私
和亦曾分賄舜日精靈鬱而不散或藉甲控告附託
爲言與後蔗畦爲發其事各正以罪一時傳播

耒陽最稱難治邑居殷賑而官獨貧奉新徐君維綱莅
任數月吏民皆服之但性行質直不借於時值邑旱
經理裁務井井有條惠均恩洽反以他事被劾識者
惜之變產完公仍多負累其弟太史維綸復變產來
楚代償絕不以累同僚兄弟同舟而歸浩然自得大

令之廉直太史之友愛當於古人中求之爲近今所罕見

秦岵齋副郎朝釭護送安南貢使歸國途間接見一以禮不私常以人臣無境外之交謝之經過供夫馬外絕無所受使竣過衡有以方物託寄都門者卻之曰殷洪喬豈寄書郵邪其風槩如此

蔗畦南楚同官余多辱締交而桑桓顧君雙溪漱浦陶君揮五兩君緘素常通轉未謀面歲庚辰雲巖學使案辰示余適未從雙溪書來悵望若失壬午秋以兒子德堅姻事寓長沙回衡次日而揮五至謂蔗畦曰

所不可解者松泉與學使蹤迹徧湖湘而獨不至辰
州有事會垣而余又後至豈非恨事誌此以見兩君
相愛之雅